

[Fonso Roixo apersenta-se]

001.

Pregúntan-me quien será
L ambersador Fonso Roixo.
You respondo: Sei alhá?
Mas cumo inda mais que un coixo

002.

Bien s'agarra un mintiroso,
Lougo debebe acrecento,
Antre sério i melindroso:
Ye un almanecha q'andrento

003.

An beç de tripas ten bersos.
I dá-me cabo de l caco
Anquanto ls bersos q'ancemba
Lougo al papel nun le saco.

004.

Nun sei por donde andará
Sou belhete d'antidade:
Mas qualquiera die yá l traio
I, se tubir, sue eidade.

005.

L sendinés mais anti(g)o
Chamában-le Fonso Roixo.
Quien nun sabe donde bieno
Ye cumo se fura coixo.



006.

Ambersa por anquemenda
i faç bersos de sfergante,
ten dies que le sálen tanto
que nun hai mano que aguante

007.

a screbir la bersalhada:
muitos scónden-se an beneiros
i puoden tardar a anhos
a salir puls morredeiros.

008.

Na bielha Grécia, ls sabidos
sacában filosofie
anquanto íban de camino:
eiqui you deixo la mie.

009.

Ye boubo quien faç poemas,
quien nun ls faç mais boubo ye:
se stamos mal cun poetas,
sien poetas que serie...

010.

Quien nunca boubadas fizo,
nunca boubadas aceita:
mas l mundo que demanda
solo nas boubadas spreita.

011.

Este poeta un milagre
muito gusta de andonar:
poner l anti(g)o i l moderno
junticos a relumbrar.

